

道門通教集序

帳一

天師立教於西蜀廣成終老於益州故蜀之人奉道為盛而儀注亦甚詳第所傳素無刊本差誤寶夥頃觀中藏書既成適左史簡池劉公太常眉山朱公官中都元素因宗丞二江李公有請得都下道經數百卷皆吾蜀所缺者其間科儀居多乃令小師太古參較同異考古辨今始自童蒙訖於行教綴緝成集以貽後人會掌兩川黃籙四方同人莫不輻湊用是俾鉞諸本與眾共之予嘗患不善斲者旁觀神手又從而指笑之或則鉗口結舌秘為己私終身不肯吐一辭與吾徒是正豈太上為人則愈有愈多之意教門缺典不特此議者尚同是念以修正一廣成之風不亦宜乎嘉泰改元辛酉季夏江原樓庵道士呂元素書

天師因經立教而易祭祀為齋醮之科法天象地備物表誠行道誦經飛章達款亦將有以舉洪儀修清祀也是故歌雍詩頌清廟使聲成文謂之音可以通于神明禱于上下唱步虛詠洞章原其理也亦無二致自天師立教之後而道家者流合規儀者則失於聲音之學得音聲者失於規儀之備亦猶公輸子之巧不以規矩安可以制其方圓乎宋時鶴林呂氏因詣京師覽藏典而搜括道玄編成集策自之曰通教集焉上自

天子下至庶人為國為家為存為亡崇修熙祭欽崇道教無不旁通抑亦使學人必以規矩而通達其教典觀其用心亦善矣雲臺何公亦因而發明而使人誦錄科教編類錄教集通行於世二書之中互有得失觀覽之者不無疑焉今錦城三井觀道士馬道逸運跡於簪裳者積有年矣留心於科教者未嘗時輟於是混通教錄教二集取其長者類聚以成一家之書鉞梓以廣其傳囑予以叙其意愚曰講學之中予每留心科教之內積年以

來予亦荒嬉子以為教而弘是心予敢不勉以成其美學人得此以知執範志士修之以通神明是亦教門之盛事也誰不予之歲在元貞中秋仁安觀長講弘道悟真大師韓混成謹序